

# ORATIO DE PACE, DE'QUE EAM RATIONIBVS

RETINENDI: ITEM QVOD NVLLA  
sufficiens causa sit, cur nominis  
Christiani Principes arma  
aduersus se mutuò  
sumant:

Ad illustrissimos iuxta ac potentissimos, Hen-  
ricum & Philippum Gallix ac Hispanix  
Reges, in vltima belli transactione  
Gallicè cōscripta & habita

A G. AVBERTO PICTAVIENSI IN  
Curia Parlamenti Parisiensis Aduocato: in Lati-  
num uerò idioma nuper à Martino  
Helsingo tralata.

PARISIIS,  
Apud Federicum Morellum, in vico Bellouaco,  
ad vrbanam Morum.

M. D. LX.

RECEIVED  
AT THE  
OFFICE OF THE  
TREASURER OF THE  
UNITED STATES  
DEPARTMENT OF THE  
INTERIOR  
WASHINGTON, D. C.

FOR DEPOSIT  
IN THE  
OFFICE OF THE  
TREASURER OF THE  
UNITED STATES  
DEPARTMENT OF THE  
INTERIOR  
WASHINGTON, D. C.

RECEIVED  
AT THE  
OFFICE OF THE  
TREASURER OF THE  
UNITED STATES  
DEPARTMENT OF THE  
INTERIOR  
WASHINGTON, D. C.

RECEIVED  
AT THE  
OFFICE OF THE  
TREASURER OF THE  
UNITED STATES  
DEPARTMENT OF THE  
INTERIOR  
WASHINGTON, D. C.

RECEIVED  
AT THE  
OFFICE OF THE  
TREASURER OF THE  
UNITED STATES  
DEPARTMENT OF THE  
INTERIOR  
WASHINGTON, D. C.

ILLVSTRISSIMO PRINCIPI AC  
DOMINO D. IOHANNI DVCI FINLAN-  
diæ, &c. Domino suo clemētissimo, Salutem,  
necnon prosperum ac fœlicem in rebus gerē-  
dis, atque adeo toto uitæ curriculo, successum,  
ex animo quàm humillimè precatur.

**P**ostquam in Galliã ueni, illustris-  
sime Princeps, & aliqua ex parte  
eius gētis linguam intelligere cœ-  
pi, eaq; mihi Græci sermonis uber-  
tatē, suauitatē, & elegātiā quo-  
dammodo redolere uisa est, arbitrabar operā me  
pretium facturum, si temporis nonnihil postme-  
ridiani, præcipuè quòd grauioribus animi cogita-  
tionibus minus accommodum esset, plenius co-  
gnoscenti illi linguæ tribuerē. Nam etsi nō sum  
nescius, eius mihi usum in patria uel nullum, uel  
sanè perquàm exiguum, fore: (siquidem perpau-  
ci illic reperiūtur, qui eam ita calleant, ut in quo-  
tidiano illa sermone, quemadmodum propria,  
Latina, uel Germanica, utantur.) tamen quum  
multa præclarè & eruditè Gallicæ gentis idioma-  
te scripta passim reperiantur, quæ nō absque fru-  
ctu legi ab eo interdū possint, qui eiusdem idio-  
matis nō prorsus sit ignarus, ideo uel eam ob cau-  
sam eatenus discenda mihi uidebatur, quatenus  
ad ea intelligenda, quæ scripto comprehensa of-

ferantur, usui esse posset. Huc deinde accessit, quòd tempus illud submeridianum uix utilius collocari à me posse uidebam, quàm si ludicro eiusmodi exercitio animum ad grauiora mox cogitanda præpararem. Cumque eò iam essem progressus, ut quod Gallicè scriptum mihi offerebatur, absque interpretis opera utcunque intelligerem, periculum faciendum putaui, an idem in Latinum sermonem à me trāsferri posset, necne: idque duplici de causa, cum ut ea occasione singula uerba exactius apud me ponderarem, & genuinam illorum significationem diligentius inquirerem, eoque exercitio eius mihi lingue usum citius compararem: tum uerò ut simul in Latina me nonnihil exercerem. Iubet enim Cicero, inter Latinos scriptores facilè princeps, ut qui Latinum sermonem, uel alium quemuis, reddere sibi cupit familiarem, laborem hunc, ex una in aliam linguam aliquid uertendi, ne refugiat. Porro in manus inter alia mihi uenit Oratio quædam de Pace, nuper Gallicè adeò eruditè à quodam conscripta, ut non immeritò digna censeatur, quæ multorum in manibus uersetur. Habet enim argumenta ad paci consulendum grauissima. Eam ipse exercitij causa Latio donauit. Et quauis me non latet, tralationem magis adhuc rudem esse, quàm ut in doctissimorum huius seculi conspectum prodeat, adductus sum tamen amicorum quorundam suasu, ut

typis excudendam permiserim. Tuæ autem Celsitudini, Princeps illustrissime, cùm ideo dicere eam uisum est, quòd eius argumentum tale sit, quod ad magnorum principum deliberationes præcipuè spectat ( siquidem ad hoc populorum gubernationem principes viri à Deo sibi cõmissam habent, ut pacem in terris procurèt, in eaque subditos piè & honestè uitam agere imprimis efficiat: ad quod C. T. illustrissimam animo propendère omnes antiquissimi iuxta ac nobilissimi regni Sueciæ incolæ, sibi non minus gratulantur, quàm quòd nomen in Anglicana illa legatione, qua sapientissimè prudentissimèq; nuper defuncta est, sibi tam celebre comparauerit, nulla ut uetustate id obliterari queat) tum ut cùm singulari me clementia & fauore eadem tua Celsitudo illustrissima hætenus semper complexa sit, intelligeret suum fauorem non infœliciter collocatũ, sed in eo repositum esse, cui uitium animi ingrati semper uisum est turpissimum fœdissimũque. Et quidem cùm referendi beneficij ratio multiplex sit, grati certè animi significatio pars quædã remunerationis à prudētissimis hominibus semper existimata est. Quocirca, ut cùm tuæ Celsitudini, tum aliis testatũ facerem, beneficia me grata mente recolere, ob eaque ad omnia præstanda obligatum me reuerenter agnoscere, quæ pro mea qualicunque tenuitate subire possim, laborem

hunc, licet in specie tenuem, Celsitudini tuæ illu-  
strissimæ adscribere uolui, quem ut clemēter ac-  
cipiat, bonique consulat, necnon me, ut hactenus  
cōsuevit, gratia & fauore prosequatur, perquàm  
humillimè peto. Datum Lutetiæ decimo octa-  
uo Calendas Augusti, Anno Christi supra mil-  
lesimum quingentesimum sexagesimo.

S. T. C.

addictissimus

Martinus Helsingus.



## ORATIO DE PACE, DE'QUE

EAM RATIONIBVS RETINEN-

di: Item quòd nulla sufficiens causa sit, cur nominis Christiani Principes arma aduersus se mutuò sumant: ad illustrissimos, necnon potentissimos, Henricum & Philippum, Gallia ac Hispania Reges, in vltima belli transactione Gallicè conscripta & habita à G. Auberto Pictauiensi, in Curia Parlamenti Parisiensis Aduocato, in Latinū verò idioma nuper à Martino Helsingo tralata.



Vltis fortè mirum uidebitur, illustrissimi Reges, quòd solus ego ex omnibus suprema huius Curia Aduocatis, in cōspectum uestrarum Maiestatum nunc prodeam, ut gratias uobis, subditorum uestrorum nomine, pro Pace, quam eis concessistis, reuerenter agam, eadēque opera suppliciter à uobis petā quòd in ea illos felicitàte postmodum conseruetis. Verū enim uerò si quis perpendat, quòd antiquitus mei ordinis homines, tam ad persuadēdum, quā ad dissuadēdū, quoties res aliqua grauior & periculosior incideret, semper primi surrexerint, uidebor fortassis in hoc ni-



hil alienum mihi usurpasse, neque officij limites usque-  
 adeò excessisse, præterue officij quid fecisse. Etenim qui  
 à teneris annis in priuatis rebus cognoscendis ita sese  
 exercuerāt, ut illarum plenā adepti uideātur cognitio-  
 nem, cū tamen propter malitiam & dolum siue ver-  
 sutiam illorum, qui eas tractant, ualde sunt obscura &  
 intricata, illi non possunt non esse bene instructi ad pu-  
 blica negotia intelligenda, quæ multò sunt faciliora, ut-  
 pote, quæ à Principum dissidiis proueniant, qui minimè  
 consueuerunt dissimulare, iū sue suū iudiciariis illis for-  
 mulis intricatum reddere, uerū qui conitantur, quod  
 iustum ipsis uideatur, sperantes armis illud æquū se ha-  
 bituros, quod aduersaria illorum pars sua illis sponte da-  
 re recusat. Deinde si consideretur, quod qui ad negotia  
 publica tractanda adhibentur, sæpenuerò professionis  
 meæ homines ad priuata sua negotia discutienda accer-  
 sant, plenā in omnibus illis fidem attribuentes, nulla am-  
 plius supererit causa, ob quā mihi temeritati uertatur,  
 quod postquam plurimos annos publicè ad priuatorum  
 commodum & utilitatem loquēdo me exercui, ad pu-  
 blicam etiam commoditatem publicè meum nunc offi-  
 cium exhibeam, palām gaudium illud testificādo, quod  
 ex communi omnium letitia percepi, quæ plurimos sa-  
 nē usqueadeò commouerat, ut in uita periculum non  
 pauci eius causa deuenerint, si fides illis habeatur, qui  
 aiunt, non minus periculosum esse gaudium uehemen-  
 tius, quā dolorem extremum. Imo & ipsemet, Reges  
 potentissimi, qui aliās tamen adsueui ob res latas uel



*aduersas, quæ possunt huic uitæ mortali obtingere, quâ  
minimum commoueri, ita sum in præsentiarum gau-  
dio affectus, ut orationem subditorum uestrorum nomi-  
ne ad uos habiturus, mādātū huiusce rei ab illis vix ullū  
expectarim, quanuis certus sum ratum illos quod ago  
habituros. Deinde in causa adeò ampla, in qua multò  
facilius est principium, quàm finem, reperire, haud cō-  
modè scio unde hæc ducatur oratio, & multo adhuc mi-  
nus qualis exitus sit futurus, nedum quibus argumentis  
audiendi à uestris Maiestatibus beneuolentiam mihi cō-  
ciliem. Noui enim eiusmodi Regibus esse aures (qui ob  
maiestatis splēdorem non putantur ex communi illo or-  
dine naturæ esse, ex quo reliqui sunt mortales) ut unicui  
que satisfacere perquàm sit difficile, præsertim uerò il-  
lis, qui inter nostros magistratus educati, perpetua qua-  
dam cum libertate, quod proposita causæ commodum  
& aptum, & non quod auditoribus iucūdum uel dele-  
ctabile uideatur, dicere consueuerunt. Expertus es autē,  
Rex Christianissime, satis, ut coniectura auguror, quòd  
Galliarum Rege nihil dignius sit, neque Gallis aptius,  
quorum ob id patria, & Gallicum nomē, solidam quā-  
dam spirāt libertatē, quā sermones liberi & ingenui, ut  
non tam spectetur quid auditu gratum, quàm quid fa-  
ctu sit utile ac necessarium. Nam etsi non rarò malam  
ineant gratiam, & asperius reiiciantur, qui mala, quæ  
futura prospiciunt, maturè corrigere student, quàm qui  
spreto salutari consilio, ea postmodum committunt: vir  
tamen cordatus, qui potentiorum fauorem non nisi sola*

uirtute uenatur, nunquam intermitteret, quin sententiã,  
 de qua certus est, liberè dicat, sola suorum dictorum ue-  
 ritate aduersus omnium cõtrarias opiniones facilè mu-  
 nitus, potius existimans omnem futuri commodi spem  
 amittere, adeoque suam ipsius uitam periculo expone-  
 re, quàm debitum officium, quo omnes homines tam  
 Reip. quàm propria famæ propugnãda, tenentur, dese-  
 rere. Ac profectò quemadmodũ bonus medicus ad cor-  
 poris morbos ritè curandos ex officio tenetur, prout mor-  
 bi exigit qualitas, acria interdum adhibere, etiam si mi-  
 nus patienter eiusce modi curationis modum ferat agro-  
 tus: ita in animi morbo sanando, constanter & liberè a-  
 gritudinum causas & occasiones arguere nos oportet,  
 atque simul ostendere, quòd non tam fiat ad eum repre-  
 hendendum, ad quem nostrum dirigimus sermonem,  
 quàm ut sui cum officiũ commonefaciamus, inque rectã  
 uiam, si ab ea fortè aberrauerit, reducamus. Quãquam  
 nihil minus sit, quàm ut quid habeam, quod aliqua nũc  
 reprehensione dignum uideatur, ob quam in alicuius me  
 odium incursum uerear, quin potius econtrario in  
 magna cõstitutus sim difficultate, ut ostẽdam, atque pla-  
 num faciam, quot laudum præconia promeriti sint, qui  
 nobis hanc pacem tantoperè expectatam, tantoperè de-  
 sideratam, procurarunt: deinde, Deo omnium bonorum  
 authori, & uobis, Reges inuictissimi, gratias agam, qui  
 non grauati de armorum rigore, ut communi tandem  
 paci consuleretis, remisistis: necnõ & generosis Principi-  
 bus ac dominis, qui ad finem eam adeo fœlicem, Deoque

Et hominibus pergratum, perduxerunt. Verum de pace uerba facturo mihi obiicere hinc quidam uidentur, sermonem instituere me de re propemodum superflua, adeo que nimium vulgari, puta quæ nemini non antea satis cognita sit: illis aliud non respondendum arbitror, quam uniuersum Christiani orbis circulum in magno futurum gaudio, si uerè hac ab illis dicantur, sitque de pace tractatio adeo uulgaris et trita, nullus ut eam Princeps ignoret. Sunt sanè quamplurima, de quibus splendide quis loqui, prolixè sermocinari, et suum ostentare ingenium non exigua cum laude potest: quemadmodum non paucos etiam hætenus audiuius, de bello ritè gerendo prolixè satis uerba fecisse: pacis uerò, rationisque eius conseruandæ, quò principalis orationis nostræ scopus tendit, superfluos fuisse habitos sermones, credo equidè neminem è uestris subditis, Reges illustrissimi, conquerentè uos audiuisse, neque eiusmodi de pace sermones uestre aliquod detrimentum Reip. attulisse, nedum uos ipsosmet in aliquod uitæ periculum coniecisse, cultum uel diuinum diminuisse, aut religionis statum ulla in parte disturbasse. At non usque adeo demiror, de pace me uerba facientem à nonnullis notari ac reprehendi, quàm illud iam pridem sum admiratus, ut alios omittam, quibus hoc æquè ab initio statim fuerat admirationi, quòd tu, Rex Christianissime, tam magni, tamque florētis regni uiribus subnixus, tot illustribus principibus comitatus, stipatusque nobilitate adeo generosa, nationes extraneæ, Europa et Asia, quem tot suspiciunt, uenerantur,

inque maximo habent honore: quem prater eà subditi  
 tanta prosequuntur obedientia & amore singulari:  
 terra denique marique Rex adeò potens, tot ciuitatum  
 dominus, nec non hominibus diuitiisque tantum abun-  
 dans, quantum unquam necessitas requirat, animum  
 ad honestas pacis conditiones adieceris: cùm præsertim  
 quasi indignum tua maiestate, titulòque Regis Chri-  
 stianissimi, uideretur, tuos subditos: uerùm quid dico tuos  
 subditos? imò totam potius Christianitatē, paci & dul-  
 ci concordie restituere. Quod porrò Ethnici olim uerum  
 ignorantes Deum ad eos solùm pertinere de pace loqui  
 arbitrati sunt, qui reliquis essent debiliores, id ad eos  
 profectò nunc spectat, qui spiritu sancto sunt inspirati,  
 Deoque præpotenti præ reliquis accepti magis. Deinde,  
 quemadmodum nec tu, Rex Christianissime, nec tui ma-  
 iores, aliquem regem uobis superiorem ulla in re unquā  
 passi estis, ita nec in pace danda Catholicus te ut ante-  
 uerteret permisisti: idque non tam ob priuatum tuum  
 aliquod commodum, quàm ob communem Christianæ  
 Reip. utilitatem. Siquidē è duobus uobis, Reges fortis-  
 simi, omnium mūdi partium, quàm latè se Christianis-  
 mus extendit, tranquillitas & felicitas ferè depende-  
 bat. Parentes uestri ob mutuas dissensiones triginta his-  
 ce annis elapsis absque ulla intermissione omnes suas ui-  
 res, & neruos in hoc impendebant, quò mutuo se bello  
 conficerent, nec nisi pauci àdmodum ex illorum regnis  
 Christiani fuerunt, qui calamitatum illarum, quæ ex  
 continuis illorum dissensionibus proueniebant, non facti

sunt participes. Nam uel tu imprimis, Rex Christianissime, abundè oculis contemplatus es, quale toti mundo spectaculum, duratibus illis bellis, exhibuerunt: cum singulis propemodum diebus nihil aliud uisum sit, quàm urbes euertere, castella & uicos incendio absumi, imperij fines deuastari, adeoque integram interdum regionem depopulari, inque deserti formam redigi, ita ut nullus in ea ausus sit prodire, conspiciendum uel sese præbere, non aliter quàm in uasta solitudine, quæ ferarum bestiarum metu deserta iacet. Interea temporis principes iam in hoc iam in illud intenti, suos exhauriebant atque profundeabant thesauros, Ecclesiasticos non absque magno animi dolore de decimis molestabant, rusticos tributis, ciues nouis exactionibus, affligebant. Et præter hæc omnia, postquam plurimum sanguinis utrinque effusum est, prehenderunt tandem, parum, aut nihil prorsus, alterum alteri ademisse. Ita proprio exemplo sunt testificati, magnorum Regum cõsilia & molimina tam exiguum sæpenuerò sortiri effectum, quàm aliorum inferioris status hominum conatus. Ad hæc, serpentibus hisce communibus malis, quibus ipsi se implicabant, & dum cuncta ad ipsorum fierent imperium, subditi in principum suorum absentia ueteris obedientiæ obliti, occasionem rerum omnium euerfioni præbuerunt. Iustitia nanque, quæ columna & basis est omnium rerum publicarum, ob horribiles bellorum motus uacillante, & tantoperè languescente, ut illi difficillimum, atque adeo propemodum impossibile esset, aliquam retinere disciplinam & obedientiam, nõ

alia de re vulgò sermo habebatur, quàm de hostium in-  
 cursionibus, rapinis, latrocinis, sacrilegiis, homicidiis cò-  
 sultò & prameditatò perpetratis, de que honestarum  
 & pudicarum matronarum còstuprationibus, uirginũ  
 uiolatione, & earum, qua diuino cultui dicata fuerāt,  
 raptu, necnon aliis scandalis, & execrandis sceleribus,  
 qua mente solũ complecti admodũ foret difficile, ne-  
 dum uerbis exprimere. Animaduertiſti insuper, Rex  
 Christianissime, quòd prater omnia hæc incommoda iã  
 enumerata, ex bello etiam prouenerit insignis & Dei  
 & Christiana religionis contemptus, itẽ aduersus ma-  
 gistratum inobedientia, in unumquemque impietas, bo-  
 narum literarum deplorandus interitus, in iuniorũ pe-  
 ctoribus effrenis quadam audacia, & temeritas immo-  
 dica, in senioribus uerò dolor & animi cruciatus immẽ-  
 sus, eò quòd ad tempus illud usque tam triste & lamẽ-  
 tabile uixerint, quo contra natura ordinem sæpẽ coacti  
 sunt, durante ipsorum uita, charissima liberorum corpo-  
 ra sepelire, abs quibus id officij potius erat expectandũ.  
 Et tamen audiuntur adhuc aliqui, Rege Christiano qui  
 indignum arbitrentur, ut quibus hæc mala è suo regno  
 depellat, rationes querat, suosque subditos quibus onere  
 hoc adeò calamitoso subleuet, occasiones non repudiet.  
 Sed prò Deum immortalem, quam commiserationẽ ani-  
 mo sustinuisse uos, Reges clementissimi, oportuit, cùm  
 ad singulos propẽ passus, miseros limitaneos illos uestros  
 subditos, ante Maiestates uestras obuersantes, magna  
 cū difficultate ab incendio, & inimicorũ gladio libera-



tos, omnibus suis bonis spoliatos, domibus expulsos, in omnium rerum extrema necessitate constitutos, omnibus denique miseriis oneratos, morbis affectos, vagabundos, non aliter quàm aqua & igne interdictos, paupertatis angustia & squalore repletos, pristina dignitate priuatos, nihil præter animam languidam, & in misero corpore ingemiscentem retinentes! Corpus uerò non solum fame & inedia tabefactum, sed omni insuper genere calamitatum & miseriarum prorsus afflictum, uidiſtis? Iam uerò postquàm cælesti gratia inspirati & adiuti, pacem à uobis mutuò obtinuistis, omnia illa incommoda, quæ recensui, cessabunt, uirtus in pretio erit, florebit bona litera, pauperes diteſcēt, diuites de suis rebus in tuto manebunt, iuniores auxiores fient, prouectioris ætatis homines latabuntur, urbes euerſæ reſtituentur, pagi antea deserti rursus inhabitabuntur, religio collapsa instaurabitur, principum maiestas suspicietur, magistratibus obtemperabitur, nobilitas in honore florebit, iuuenes in rebus se honestis exercebunt, seniores quod reliquum est uita tempus secura cum quiete transigent, uirgines in latitia nuptui dabuntur, uidua in sua castitate secura uiuent, agricola terram absque ullo metu colent, opifices suo in officio tuti laborabunt, mercatores certis hætenus finibus inclusi, terra marique absque direptionū metu negotiabuntur. Denique quod ad nos attinet, Principes potentiſſimi, qui fælicitatem hanc omnibus orbis Christiani populus tribuistis, etsi nulla gratitudinis significatio cū rebus uestris bene gestis dignè cōparari queat,



hoc tamen inde commodi estis habituri, ut minus in posterum solliciti sitis de Heluetiis in uestram militiam conscribendis, deque tot militum Germanorum legionibus, equitumque & sclopetariorum tot horridis cohortibus accersendis, præterea neque cura uobis erit, triremes tot in mari semper armatas retinere, nec stipendia tot præsidiariis in terra militibus persolvere. In summa, nullus erit cuiuscunque conditionis uel status inter uestros subditos, uel socios fœdere iunctos, qui uniuersale huius pacis bonum non sentiat. Nec erunt nisi unius cuiusdam farinae homines, qui ob bonum hoc publicum lamentabuntur, scelerati nimirum, qui suum ex piscatura in aqua turbida commodum hæcenus ad tempus quæsiuerant, qui que ex publicis calamitatibus priuata soliti sunt utilitati studere, tempus non amplius rapinae accommodum habentes præter illud, quo omnia ad miserabilem quandam confusionem nutabant. Nunc autem postquam pacis tranquillitas illuxit, omnesque tempestates illas pacauit, necnon profundas elapsi temporis tenebras collustrauit, metuere tandem incipiunt miseri homines, ne quas conspirationes, existente illa belli nebula, occultare potuerant, in pacis nunc lucem prodeant. Suntque in similifere metu, quo fur solet esse nocturnus, cum auroræ diei appropinquare uidet, antequam prædam in spelūcam suo destinatam latrocinio detulerit. Ipsos igitur intelligere facite, Principes iustitiæ patres, quod quemadmodum è publicis incommodis illorum prospera dependeat fortuna, ita uicissim ipsorum infortunium è bono

publico: tempus denique uenerit, quo in apricum crimina protrahatur, uitia manifestentur, errata innotescant adhibita ea castigatione & pœna, quæ cuiuslibet sceleris magnitudini respondeat. Caterum homines probi, qui semper sibi bene conscij fuerant, Deique timorem ante oculos die noctuque pie seruauerant, ualde sunt solliciti, quânam gratiarum actione Maiestates uestras, nec non alios principes uiros in uestris aulis, dignè cohonestare debeant, pro eo quòd hanc à uobis rerum omnium fœlicitatem acceperint, quam futuram sibi ex optatissima hac pace præuiderant: nec aliud iam agere possunt, quàm igne ad lētitiā accenso, publicis item acclamationibus, supplicationibus, aliisque, quibus possunt modis, extremum sui gaudij testificari. Sūntque gratiarum illæ actiones non quidem quales cupiunt, uerum quales nunc pro exigua ipsorum facultate exhibere uobis possunt. Et quidem hucusque intellexistis à me, Reges inuictissimi, quòd ab omnibus intelligere hætenus potueratis, nimirum quæ nobis mala bellum, quæque bona pax apportet. Verum nō ob hoc præcipuè uobis uerba factururus ueni, cū probè sciam hæc uos multò melius ab ipsa rerum magistra experientia didicisse, quàm ipse possim uerbis exprimere. Sed quidquid hætenus à me dictum est, hoc eò solū spectabat, mihi ut aditum facerem uobis declarandi, quibus modis pax constituta & conclusa, commodè seruari retinerique possit. Compertum est enim non rarò, quòd sicut magni Reges bellum gerere norunt, ita etiam pacem inire cū opus sit, intelligant:

at semel factam ita seruare, ut ad ueteres querelas non deueniatur, res est profectò nimis rara, & quidem difficilior, quàm quispià cogitet. Quippe Principes pacem sæpè propterea faciunt, quòd belli sumptibus destituantur, atque ea propter quotidie usu uenire conspiciamus, quòd quamprimùm pacis beneficio rem suam aliquantulum auxerint, bellorum mala mox instaurent. Quèadmodum ex arbore præcisa rami renascuntur quamplures, radice nondum penitus euulsa: ita ex bello, quod pace coacta sopitum est, alia sæpè bella repullulant longè crudeliora, si tempestiuè non prospiciatur, ut omnes malorum occasiones tollantur, ueteresque odiorum scaturigines obturentur, è quibus uelut fonte pestifero priores humores in Principum corda ebuliant, eò que pacto easdem illic contentiones exuscitent, quæ paulò antè uidebantur extinctæ. Neque enim incertum est, factas esse quamplurimas inter Reges & Principes, ob illorũ dissensiones, huiusmodi trāsactiones. Nam quoad dissensionum radix non fuerit diligenter extirpata, conueniri quidem publicè pro pace constituenda uisum est, bellum tamen interim secretò parari, necnon eadem tuba classicum cani, qua paulò antè pax proclamabatur. Hic igitur, Principes illustrissimi, maximis precibus à uestris maiestatibus contendo, me clementer ut audiant, meque ita intelligere dignentur, ut nullũ à me uerbum prolatum prætereant, quod ab ipsis non obseruetur, ac expendatur: uobisque persuadete, Reges potentissimi, me in hac patientia & beneuolentia contentione non

esse qui loquor, uerum celeberrimos diuersarum linguarum authores, qui me suo uelut interprete in eo uobis communicando utuntur, de quo alios sæpè Principes ac terra monarchas admonuerant. Ac primū quidem minus considerati mihi uidentur, quantumuis sint magni, qui in aliquo corporis morbo sibi uenas mox secari, sanguinē è corpore extrahi, suāque membra inuri patiuntur, tanto se periculo huiusmodi pharmacis exponentes, quanta ex his utilitas ad illos accedere possit: initio tamen auersantur & refugiūt illas adhortationes, quibus ad eos uti constituerunt, antequam experti sint an eis utiles futura sint necne, experimentum quod facilius est, & minimo cum periculo subiri potest. Proinde si uestris maiestatis ad finem usque benignè me audire non displiceat, paucis uobis probare conabor, homines ad bellum natura minimè natos, multoque minus potestatem à Deo Opt. Max. ad arma prouendi concessam esse: usque adeo ut nulla causa esse possit quantumuis in speciem magna, quæ Principem Christianum, ut arma aduersus alterum sumat, permouere debeat, quin multa alia sint, quibus Principum dissensiones componi melius possint, quàm per periculosam Martis aleam, perque incertum sanguinolentæ pugnae euentum, ubi cæca & inconstans dominatur fortuna, tam citò uictoriam assignans illi, qui causam defendit iniustam, quàm ei, cui ius suffragatur & æquum: parum sollicita utrum boni euadant uictores & mali uincantur, uel seccus. Ad extremū ea etiam commemorabo, quæ doctiores è nostris antecesso-

ribus in scriptis nobis reliquerunt, quibus regna in trā-  
 quillo statu retineri posse crediderunt, quorum doctri-  
 nam, unā cum rerum experientia, si sequamur, alterum  
 ut alteri iungatur non indignum comperiemus. Ut igitur  
 rem aggrediamur, supplex à uobis peto, Reges po-  
 tentissimi, ante omnia apud uos animo cōsideretis, quo-  
 modo in hunc mūdum hominem nasci Natura uoluerit,  
 an talem illū produxerit proximo ut bellū inferat. Si-  
 quidem, cornuā ne ei atque tauris furiosa, aut ungues  
 acuti ut leonibus, aliud ue munimen terrificum, uelut  
 apris, ab illa concessum est? Aut longa & fortī ne pro-  
 bos cide illum tanquam elephantos armauit, uel duris  
 & ferreis squamis ut crocodilos, dentibus uenenatis ut  
 aspides, aut uenenifero aculeo ut scorpiones, aspectū ue  
 mortifero ut basiliscos? Certè harum omnium belli &  
 feritatis notarū loco benigna mater Natura homini de-  
 derat membra nuda, delicata, absque ullis armis: faciem  
 prætereā mitem, & benignam: corpus erectum beneq;  
 proportionatum, oculos uenustos & amoris conciliato-  
 res, vocem gratam & iucundam elargita est: brachia  
 in longū, ut amore sincero beneuolentiaque mutua pro-  
 ximum complecteretur, protraxit: osculi denique sen-  
 sum attribuit, quo unius quasi anima alterius se iūgeret  
 accopularet: vocem quoque in usu uerborū distinctam,  
 ut amica petitione, absque ulla ui uel coactione, ab al-  
 tero, si cuius indigeret, impetraret. Rationem deinde &  
 iudicium addidit, ut temerè ne quid susceperet, alteri ue  
 faceret, sibi quod factum nollet. Solitudinem ut auersa-

retur, societatem uerò diligeret, effecit. Ornauit illum insuper scientiarum bonarumque literarum intellectu capaci, quæ ut homines ab omni barbarie & feritate abducunt, ita etiam constanti & firmo illos amicitie uinculo copulant, quæ in perpetua mutuâque illos deinde beneuolentia conseruat. Dona distribuerat denique unicuique usque adeo pretiosa, uaria, & omni digna admiratione, peculiarem uel corporis uel animi præstantiam, aut ad minimum aliquid amore dignum, iam eo, iam alio modo: ut difficillimum, adeoque impossibile sit, quempiam reperire, qui ob Naturæ donum aliquod singulare in ipsa natiuitatis hora perceptum, non diligatur, acceptusque habeatur. Ad hac omnia dederat homini prudens ac sapiens Natura etiam risum ad animi lætitiâ testificandam, lachrymas ad denotandam misericordiâ, cōmiserationem, & dolorē ex amici rebus aduersis contractū. Credo equidē, Reges clemētissimi, quod postquā diligenter animo cōsiderastis qualem nunc uobis hominem depinxi, cōclusum uos apud uos habere, Naturam ad pacem colendam hominem produxisse, non ad bellum: ad mutuum amorem, nō ad odium: ad beneuolentiam, non ad simultatem: ad concordiam, non ad dissensionem: ad comitatem, non ad duritiem: breuiter ad auxilium proximo ferendum, uitamque illi conseruandam, non ad eius ruinam & interitum. Caterum antequam finem huic nostro sermoni imponam, uos rogo, Christianissimi Reges, diem uobis aliquem, quo bellum inter uos peragebatur, proponatis, atque huiuscemodi



facti speciem animo concipiatis. Quid si bona hæc dea  
 Natura, omnium mater & parens, ex angulo tum ali-  
 quo nemoris in duorum inimicorum Principum exerci-  
 tu contemplata fuisset, homines tot armatos, tot sagit-  
 tarios, tot leuioris armatura equites, tot peditū cohortes  
 ex Gallis, Hispanis, Italis, milites tot caligatos, tot Hel-  
 uetios, tot itē equites loricatos seu cataphractos, tot sclo-  
 petarios, bombardarios, lancearios: armaturas illorum  
 deinde micantes, facies pallidas & semianimes, incessus  
 furibundos, oculos ardētes & scintillantes: tympanum  
 postea audiuisse sonare, classicum cani, tuba signum da-  
 ri, unōque demū impetu terrificum illud fulgur è machi-  
 nis aneis, sclopetis & bombardis displodi: mōxque præ-  
 liantium consiliū, hastarum confractioes, lācearum  
 collisiones: deinde horribiles illos vulneratorum clamo-  
 res, cadentium gemitus miserabiles: terram denique to-  
 tam sanguine conspersam, coopertāque corporibus in-  
 furoris concursu intersectorum, ubi nec occisus nec occi-  
 sor se mutuò unquam antea uiderant, tantum abest al-  
 ter ut alterum uel unico uerbo offenderit. Ecquid dictu-  
 ra fuisset hæc bona mater, si triste eiusmodi spectaculum  
 fuisset contemplata? usā ne fuisset iustissimo iure hisce  
 „ uerbis aut similibus? Quæ monstra, quæ spectra, quos fu-  
 „ rentes ita & rabiosos ad mutuò se conficiendos uideo?  
 „ Credibilē ne est quòd sint homines illi, quos ipsa forma-  
 „ ui, educaui, enutriui, ad hoc solum ut se inuicem ama-  
 „ rent, diligerent, iuuarent? Quis malus genius ipsos adeò  
 „ dementauit, furiosos & planè mente captos effecit? De



quonam inferni baratro hæc tam infelix belli pestis erupit, quæ pulcherrimum meum opus miserè adeò fœdauit, corrumpit ac deformauit? Quæ saga creaturarum harum animos in tantum incantauit, ut inter omnes terræ bestias ne unam conspicer, quæ minus hominis nomē mereatur, si ad istos conferatur? Vtinam bellatores furiosi in speculo contemplari uos, unà cum rebus uestris gestis, totòque habitu possētis. At in quem usum uobis oculi proderunt, si ingenium uobis desit? Considerate, uos rogo, quantū hac in parte, comitate nimirum & benignitate, feræ uobis bestię præstent. Neque enim magno grege congregari illas unquam uideas, ut mutuò se conficiant, & suam in uniuersum speciem deleant, quemadmodum uos facitis. Ah quomodo in animum unquā inducere potuistis, uestras ut manus eius sanguine cruentaretis, qui nunquam uos, ne in minimo quidem, re uel verbis, offenderat? Eia, eia, pergite igitur in uestro furore, quoad libuerit, posteaque conqueramini, nimis breuē me uobis uitā dedisse: uos, inquam, qui tot homicidiis tantæque sanguinis effusione, in hoc præcipuè incumbitis, quātum in uobis est, uitam uobis quam dedi, ut abbreuietis, & finem dierum uitæ constitutum crudeli & horribili morte acceleretis. Vsa fuisset proculdubio sapiēs ac prudens rerum architectrix Natura hisce similibus ue comminationibus, ut omnibus planum faceret, se non esse, quæ bellum hominibus suadeat, quin potius omnibus modis illud ipsis prohibeat, uelut pestem, atque operum suorum pulcherrimorum internecionem irrecu-

perabilem, nec non creaturarum, quas cateris illa pulchriores præstantioresque in hoc mundo produxerat, uenenum pestilentissimum. Sic elementa ordinauit, ut quanuis qualitatibus inter se maximè dissideant, certam nihilominus inter se harmoniam teneant, ut unà pulcherrimam hanc mundi machinam in integro suo conseruent statu: quemadmodum aqua licet igni sit contraria, & terræ grauitas aëris leuitati, sunt tamē certæ pacis leges inter ipsa constitutæ, quas fideliter obseruāt, ut nullum quid aduersus aliud præsumat, aut tentet. Idem conspicitur in cælestium corporum motibus, quorum quædam suos habent motus ab oriente in occasum, alia e contrariò ab occidente feruntur in orientem, cum alio quodā motu, puta, trepidationis, quem ultimò mathematici obseruarunt, ita ut in contrariis hisce itineribus nullum committatur bellum, nulla dissensio, quin omnes calorum & planetarum sphæræ suum accuratè obseruent ordinem, & leges, quas à principio illis Natura statuit & assignauit, nulla illarum neglecta uel interrupta. Usque adeò sollicita & studiosa fuit rerum natura, quò omnia, perpetua quadam pacis obseruatione, quam ab initio creationis illis indiderat, concinna quadam harmonia, integra permanerēt. Porro si bellum hominibus Natura prohibet, Deus Opt. Max. pacem seuerius mandat ac præcipit, id quod uel ex eo planum sit, quòd ipsemet filium suum unigenitum, saluatorem & redemptorem nostrum Iesum Christum, in mūdum hūc mittere uoluerit, cū pax iam esset uniuersa-

lis per totum mundum, & non eo tempore, quo Græci, Romani, Persæ, Parthi, & aliæ nationes, belli tumultibus grassabantur, modò illi ex Europa, modò hi ex Asia & Africa. Argumento prætereà nobis erit, quanto per pax Deo grata sit, quòd sacrosanctum suum Euangelium in pace ab hominibus recipi uoluerit, non armorum coactione uel ui, cum crudeles bellorum motus dulcis Euangelij prædicatio subsecuta sit. Adde quòd nihil diuina lege magis nobis præcipiatur, quàm proximi Amor, Charitas, Concordia, atque alteri ne quid aliud faciamus, quàm ab eo nobis fieri uolumus. Quemadmodum igitur & uerbum Dei sacrosanctum, necnon opera Dei uniuersa, nihil nobis tam præcipiunt, quàm pacem: ita homini Christiano nihil contrarium magis, quàm bellum. Verum quia hic locus, Reges Christianissimi & catholici, ab ipsis Theologis uobis commodius explicetur, pauca solum ad ea quæ dixi, adiiciam, hoc est ut à uestris Maiestatibus petam, animo apud se concipiant, Villagagnonem in Gallia Antartica hirsutum seu hispidum aliquem ex terra illius syluiculis nutriuisse, qui postquàm magno & diligenti studio & labore in fide Christiana utcunque esset institutus, deque mutua dilectione, patientia, & aliis uirtutibus homini Christiano competentibus, plurima audiisset, missus tandem fuerat in uestra proximè ad Amianum castra, ubi maiores, adeoque uniuersa propemodum Christianitatis uires sub uestris signis collectæ erant, necnon utriusque exercitus non longius quàm ad quinque uel sex miliaria ab inuicem di-

ſtabat. Si, inquam, occuriſſet matutino tempore, uitam  
 Chriſtianorum cognoscendi cupidus & curioſus hic ſyl-  
 uicola, duobus illis exercitibus ea rabie & furore con-  
 gredientibus, quo antea ad Rantinum ſunt congreſſi,  
 cogitandum uobis relinquo, num nouus Chriſtianus hic  
 ſyluicola, inter homines vix dum uerſari adſuetus, de-  
 que ſua fide non uſque adeo adhuc confirmatus, hunc in  
 modum ne ſecum fuiſſet locutus, imò plena uoce in pu-  
 blicum exclamaſſet? Iñc Chriſtiani ſunt, de quibus  
 „ Villagagno tanta cum laude in ſaltibus mea patria lo-  
 „ cutus eſt? Hæcine Charitas illa, quam tantopere mihi  
 „ commendauit, quam ſeruare illos uideo, multo ſe crude-  
 „ lius inuicem interficientes, quàm ferociora in noſtris mō-  
 „ tibus ulla animalia? Habent proſectò, ſi Diis placet, per  
 „ bellam reprehendēdi nos occaſionem, quòd homines ex-  
 „ traneos interdum nos deuoremus, cū illimet ſeipſos uſ-  
 „ que adeo dilanient, ut à canibus & coruis poſtea deuor-  
 „ rentur. Nobis concionantur de Deo cæli conditore, &  
 „ à furiis infernalibus ſe interim agitari permittunt.  
 „ Nos ad uitam æternam conſequendam ſedulò hortan-  
 „ tur, ipſi tamen interea temporis nihil niſi mortem ſectā-  
 „ tur & ſpirant. Aiunt totam in Deo fiduciam habere  
 „ nos oportere, ipſos nihilominus in hominibus ſuam ha-  
 „ bere ſpem collocatam animaduerto. Chriſtum adſerūt  
 „ ſuo ipſos pretioſo ſanguine ab æterna morte redemiſſe,  
 „ ſanguinem illi nihilominus audacter eius effundunt,  
 „ quem Chriſtus ſui ſanguinis effuſione redemit. Deum  
 „ communem omnibus patrem nominant, & tamē adeo

« tioso præditi sunt animo, ut se fratres mutuò horribiliter  
« interficiant. Crucem in redemptionis suæ symbolum  
« gestant, eandemque in signis & uexillis ferunt, quibus  
« ad miserandas Christianorum cedes perpetrandas du-  
« cuntur. Deum precantur ut panem illis det quotidiana-  
« num, interim ipsi & agros & segetes incendio uastant  
« ac deperdūt. A Deo precibus flagitant, peccata sibi cō-  
« donari, quemadmodum aliis in se commissa ipsi remit-  
« tunt, eodem ipso tamen temporis puncto nulli rei magis  
« inuigilant, quàm ut alium offendant, saucient, truci-  
« dent. Egregiam me Hercule operam præstitisti Villa-  
« gagno, cum in naues me tui Regis imponeres, ut ex locis  
« tam remotis ad videnda hac pulchra spectacula ueni-  
« rem. Quauis puto te uerius huc me ad tuos Christia-  
« nos duxisse, mihi ut spectaculo forent, quàm ut bonum  
« aliquod apud illos exemplum uiderem. Equidem  
plures arbitror, uera eum dixisse, postquam hisce uerbis  
aut similibus syluicola fuisset usus, atque ea propter ma-  
gis laudandum, quàm ob mendacium aliquod reprehē-  
sione dignum, tacitè apud se affirmaturos. Ad me igi-  
tur quod attinet, Reges clementissimi, integrè assecutus  
sum, quod initio mihi proposui, si Maiestatibus uestris  
persuasum sit, Deum nullo pacto hominibus, ut bella mo-  
ueant, quæ ipsa prohibuit Natura, permittere. Nūc am-  
plius nihil superest, nisi ut breuiter commemorem, an  
aliquæ sufficientes causa inueniantur, quibus Christia-  
ni, ut bellum sibi mutuò faciant, niti queant: deinde an  
ulla ne mitiores rationes ad dissidia componenda haberi

queant, ubi simul obiter, quid commodi ex suis dissen-  
 sionibus Christianitas receperit, uidebimus. Prima au-  
 tem, necnon magis occulta bellorum causa est Ambitio,  
 & caca regnandi imperandique cupiditas, qui inordi-  
 nati affectus cum diuersimode ab ipsis principibus tegā-  
 tur & occultentur, sapè illos ad subditorum quietem  
 turbendam, atque ipsam pub. tranquillitatem in horri-  
 bilem confusionem, plenam miseriarum & incertitudi-  
 nis, permutandam exuscitant. Ac proinde ingenuè fa-  
 teor me nescire, quonam spiritu agitentur, ferantur, ra-  
 piantur, quandoquidem parum adeò Dei recordentur,  
 hominèsq; tantoperè nihili faciant. Nam si animo co-  
 gitarent, Christianam legem nequaquam illis permit-  
 tere, ut nomen Christianum ad hoc sibi usurpent, quò  
 stulta suæ cupiditati aliorum Christianorum sangui-  
 nis effusione satisfaciant, persuasum apud me habeo,  
 potius quieturos illos, quam iniustum aliquod bellum  
 moturos. Deinde si ipsa lex Dei reprimere ipsorum am-  
 bitionem nequeat, aspiciant saltem aliorum potentiam  
 & uires. Neque enim ulla gens est hac nostra tempesta-  
 te, quæ, quantum bonum sit libertas, & è contrario quæ  
 miseria seruitutis, ignoret. Nullus præterea sui iuris  
 princeps tam exigua potentiæ est, nec ulla ciuitas adeò  
 parua, quæ suam non conetur libertatem defendere, re-  
 gionis fines accuratè muniendo, & alios in fœdus adsci-  
 scendo, ordinem denique in rebus administrandis ap-  
 primè seruando, nec ulla occasiones, quibus bene consti-  
 tutus Reip. status in suo uigore retineri, atque iniusta



inimicorum inuasio commodè repelli queat, negligendo. Perpendite, uos rogo, Christianissimi Reges, quomodo omnia mundi regna etiam debiliora, minores item in mundo respub. ita bello assueuerint, nihil ut fugere illorum scientiam & prudentiam possit, adeò ut nullus ferre sit, qui non promptior & paratior inueniatur ad alterius bona inuadenda & occupanda, quàm ut suo contentus uiuat, nedum facile ferat, ut quispiam de suis terra dominiis quid usurpet. Imò uos ipsimet, Reges inuictissimi, postquam bellum uobis uestri parètes quasi successione quadam hereditaria reliquerunt, abundè præteritis hisce annis, experientia didicistis, quàm raro uestra uoluntati consiliorum exitus responderint. Siquidem uictoria non minus in unam se partem, quàm in alteram inclinans, euidenti documento uobis fuerat, magnos Regum conatus sæpè perquam exiguum effectum sortiri. Contenti igitur rebus presentibus estote, inque memoriam quotidie uobis res ueniant præteritæ, necnon dies noctesque illorum apud uos exempla meditamini, qui, eò quod implenda insatiabilis cupiditatis spe regi se passi sunt, nihil unquam minus quàm suarum cupiditatu finem adepti sunt, quin incerta spe maiora acquirendi ducti, diuitias suas certas & firmas in discrimen adduxerint, atque ita tandè coacti se pares illis in pace exhibere, quos bello superare nequuerant. Hic etiam sciens ac prudens multorum principum historias omitto, qui cum noua dominia sibi acquirere conati sunt, sua propria amiserunt, illorum sæpè facti mancipia, quoru



domini esse uoluerunt, atque eapropter maiorem uita  
 partem in miserabili quadam seruitute peregerunt, quòd  
 honesta libertate contenti uiuere noluerint. Proinde si  
 animo non prorsus otioso quis secum hac cogitet, nimirum  
 quantopere Deus Opt. max. imprimis ambitionis uitium  
 odio prosequatur: deinde quàm idem hominibus sit omi-  
 nosum & detestabile: denique quòd rerum euentus nus-  
 quam minus, prout nos uolumus, quàm in bello, quod  
 iniusta ut plurimum dominandi cupiditate suscipitur,  
 procedat, fortè suo in posterum quantumuis audax con-  
 tentus erit, aliorum ut bonis auarè minus inhiet. Et  
 ut finem huic de ambitione materia faciam, experien-  
 tia sapenúmero compertum est, hodie admodum diffi-  
 cile esse, principem aliquem, quantumuis potentia &  
 viribus inferiorem, eò quòd reliquam mox mundi par-  
 tem ad iustum sibi ferendū auxiliū cõuocet, ui subigere:  
 & difficilius adhuc, aequè potentem seu parem uincere:  
 multoque periculosius, aduersus se potentiorum bellum  
 aliquod suscipere. Est porro & aliud quoddam belli ge-  
 nus, quod ad uindictam solummodo exerceri solet, Deo-  
 que propriè competit, quo interdum permiserat Deus,  
 ut principes, qui primò leuem aliquam iniuriam ulcisci  
 uoluerunt, postea coacti sint aliam ferre longè grauiorē,  
 atque ita plus sibi mali per hoc inferentes, quàm suis pa-  
 rauissent inimicis. Et quanquam iniuria interdum a-  
 dedò magna & atrox esse possit, ad uim ut eius ulciscēda  
 gratia recurrere necessum sit, prudenter tamen prospi-  
 ciendum & cauendum erit, ne armorum furore illam

ulciscētes, complures alias iniurias illis inferamus, qui prioris non fuerant conscij, nedum authores. Siquidem usu sapissimè uenit, ut maiora belli incommoda in eos cadant, qui minus ea promeruerunt, ut sunt agricola, illorum uxores, infantes, & ceteri eiusdem farina homines, qui cùm pacis tempore non admodum commodè uitam agunt, ubi bellum uiget, extrema quæque patiuntur. Quod uerò ex bello commodum prouenire consuevit, hoc est, prada, rapina, latrocinia, in illorum recidunt ingluuiem, qui ad prædandum sunt paratiores, atque ad excursiones & latrocinia exercenda exercitati magis, quique bellum consultò alere, & promercalem militiam potius quaestui, quàm decori, habere didicerant: propterea quòd non meliorem habituros se conditionem sperent, quàm ubi rempub. seditionibus turbatam, nec non fortunam instabilem, tristisque naufragio praesens imminere periculum, uideant. Ipsi deinde Principes, atque alij imperium in reliquos exercētes, ut plurimum post principia manentes, suam sub tētorijs usitatam magnificentiam ostendant, in eos miseriarum & calamitatum onus facile reiciētes, qui se ipsis opponere nequeunt, nec ullam belli occasionem praeuerunt. Sed obiiciet hìc fortè aliquis, non decere principem virum, ut ad uicini, cognati, uel fœderati alicuius principis iniuriolas, quantumuis leues, cōnieat. At, Deum immortalem, quantum ut se demittat ac abiiciat opus est, cùm aliorum auxilia inuocare, imò precibus impetrare, aut ad minimum turbam quandam barbarorum, hominum perditorum,

*prædonum, parricidarum, homicidarum, depopulato-  
 rum, conquirere per suos legatos cogitur? Nam huiusce-  
 modi homines, humanum effundere sanguinem adfueti,  
 existimantur satis apti ad faciendas belli executiones.  
 Huc deinde accedit, quòd fortis ac strenuus hic iniu-  
 riarum uindex, in tantum se demittere non rarò cog-  
 atur, ut necessarium illi sit talibus terræ facibus abblan-  
 diri, atque aureorum montium pollicitationes facere,  
 quæ regulariter adulationem comitantur, atque tãdem  
 effectum idem complere, quod adulandi animo promise-  
 rat, præcipuam thesauri & pecuniæ partem inter eos  
 effundendo, quam è pauperum subditorum sudore con-  
 quisuerat: ac horum denique peregrinorũ potestati &  
 gratiæ se totum committere, non aliter ac si probitas &  
 animi illorũ integritas usque adeò hominibus esset pro-  
 bata ac commendata, quemadmodum cognita sunt illo-  
 rum depopulationes & querimonia, à miseris agricolis  
 deploratæ, quibus tamen ut ius fiat principi cura uix  
 erit. En igitur quomodo exiguam ulcisci uolentes iniu-  
 riam, plurima indigna pati, eaque iniuria longè gra-  
 uiora, quæ ad bellum ipsos commouit, regulariter cogũ-  
 tur. Sunt prætereà adhuc alij, qui potentiæ solùm osten-  
 tandæ causâ, bella sæpè non necessaria mouent. Verùm  
 illos si quis interroget, quidnam agere cõstituerint, post-  
 quam perpulchra sua consilia in effectum perduxerint,  
 aliud quod respondeant uix habituri sunt, nisi quòd ex  
 uictoria hoc commodi sperent, in pace & tranquillitate  
 in posterum ut uiuant, & quod reliquum est uitæ tem-*

pus cum illis, quos præcipuè amant, animi recreationem  
 capientes, transigant. O homines inconsideratos! Ad  
 quid quæso opus fuit tantis periculis, tantæque innocen-  
 tis sanguinis effusione, quietem & tranquillitatē qua-  
 rere, quæ priusquam bellum exorsi sunt, fruebantur? Ad  
 quid foris magno cum periculo quærunt, quod domi tu-  
 to possideant? Ah nondum quid sit natura Eminentia  
 rectè intelligere didicerunt, nec quàm eam regere sit dif-  
 ficile, ne illis damnum inferatur, quos illa favore com-  
 plectitur. Certè si comes illi detur inuidia, ipsa non ab-  
 similis uidebitur publicis illis mulierib⁹, quæ ficta uenu-  
 statis fūco suum in amorem iuniores, quò tam corporis  
 illorum incolumitatem, quàm bona, & ipsam denique  
 ingenij tranquillitatem, paulò post deperdant, alliciunt.  
 Ad eum prorsus modum se habet Eminentia cupiditas,  
 quæ nescio qua imaginatione plurimis persuadet Prin-  
 cipibus, pulchrum esse multis imperare, atque ea per-  
 suasione ad hoc eos impellit, quotidie ad altiora ut aspi-  
 rent, donec aduersus aliquis fortunæ casus, uel diutur-  
 nior belli impensa, negotiorum ue perplexitas, cùm ui-  
 delicet consilia præposterè cadunt, intelligere illos faciât,  
 nullam maiorem esse Eminentiam, quàm quæ Principi  
 data est, ut sua corona, & prouinciis, quarum supremã  
 illi administrationem Deo placuit attribuere, contentus  
 uiuat. Quocirca desinite, Principes Christiani, desinite  
 Eminētia gratia multum uos amplius affligere. Etenim  
 si eam intra continentia & rationis fines non continue-  
 ritis, periculum erit ne integrum uniuersi orbis dominiū

ad explendam animi cupiditatem uobis sufficiat. Testis ad hoc nobis idoneus erit magnus ille Monarcha Alexander, qui cum plures ei diceretur esse mundos, quàm unū, ingemuisset fertur quòd nondū hunc integrè perdomuisset: ac si parum illi fuisset unius mundi Monarcham uocari, etiam si alium non acquisiuisset. Sed omisso hoc de imperio sermone, nescio, Reges magnanimi, an principes aliquando fuerint, qui arma sumpserint, quòd commodum aliquod inde habituros se arbitrarentur, ac, ut ita loquar, eiusmodi fortuna alea, sub eaque spe, suas diuitias adangerent, qua mercator quispiam audaculus a-quinoc-tialē & duos Tropicos peragrat, omnes Aphricæ regiones circumeundo, ut longa & periculosissima nauigatione uarias è Calicuto aromatum species adferri solitas, necnon alias Orientis merces, conquirat. Illis non aliud à me nunc responsum uolo, quàm ualde indignum Principis maiestate uideri, sordidum sectari lucrum, illudque ante oculos positum habere. Veruntamen quandoquidem imitari ipsos utilitatis suæ gratia negotiatores delectat, rationem quoque quantum inde lucri percipere queant, diligenter imprimis ineant rogo. Ad unam igitur partem rationes detrimenti ex bello percipiendi, necnon sumptuum faciendorum, qui erunt immensi: ad alteram uerò quod ex belli uictoria commodum se sperēt habituros, collocent: factaque collatione tum demum intelligent, quantum rationes dati exuperent rationes accepti. Nec iam cupio ut molestia illa, quam quolibet in regno ad primos belli rumores uidere licet, calculo hîc

subducatur, neque quantoperè subditorum in se beneuolentiam Princeps imminuat, cùm nouis illos impositionibus grauari quotidie cogitur, eorūque bona in hoc accipere, ut mox ea barbaris distribuat, qui suā illi uitam pecunia numerata diuendunt ac locant. Verū illud in suas rationes referat uelim, quantum ipsemet difficultatis & sollicitudinis sustineat: summatim deinde complectatur, quanta pecunia exercitus primò conscribendus ueniat: item quanta ueteres duces & præfectos conuocari oporteat, subeuocatos colligi, imperij fines muniri, ciuitates uallo cingi, præsidia duplicari, tympano ubique in regno signum dari, uarias belli machinationes excogitari, tormenta in belli usus fundi, ueterem tormentarium puluerem renouari, glandes apparari, papiliones & tentoria erigi, euectum instrui, triremes armari, nauigia adornari, in insidiis semper exercitum ad mare subitarium & potentem habere, qui hostes, ne quam irruptionem in terram faciant, arceat & inhibeat: deinde quantum laboris & curæ subire ipsum necesse sit, ut socios & confæderatos, tam pecuniæ largitionibus, quàm aliis mediis, retineat. Item quo pacto milites mercenarios ex Heluetia & Germania acciri curet, Principes extraneos in fædus adsciscat, eos, qui aduersario fauent, abalienet, suāsque in partes attrahat, hostium denique consilia exploret, sua uerò illis tegat & occultet. Et tamen unà cum omnibus hisce laboribus, & miseriis propè infinitis, nihilo secius in perpetuo uersabitur metu, ne aduersus aliquis fortunæ casus interueniat.



His itaque ritè ponderatis, comperiet nullam esse uictoriam adeò splendidam, etiam quæ à principio fuit certa & indubitata, quæ uictori non magno empta pretio cōtingat, quæque nō plus apportet damni quàm emolumentum. Nam si ut sæpè fit, multos in bello præstantes uiros perire usu ueniat, qui ducatus, quod regnum, quæ ciuitates etiam amplissimæ, ad remunerandum horum uirtute præstantium virorum vitam sufficere poterunt, ut illorum generositati æquiualens cōpensatio fiat? O quātam ex eo consecutus es laudem, & memoriam immortalem, præstantissime Imperator Antonine, quòd uerbis sæpenuerò publicè testatus sis, unius te tuorum ciuiū uitam malle seruare, quàm mille è tuis inimicis morti tradere! Videte igitur Principes Christianissimi ecquod emolumentum è bello tam magnum percipere possitis, quod populi uestri, nobilium & propinquitatis gradu proximorum, pretiosa uita equipolleat? Et si quidē uobis omnino cordi sit, uestros homines in aliquo occupare, etiam atque etiam uidete quæso, ne uosmet decipiatis, ac illorum corpora simul & animas temerè periculo exponatis, uobisq; in mentē ueniat, quòd ad periculosam illos obsidionem ducentes, citius minori que cum periculo, ciuitatem uestro in regno extruere illos feceritis, q̃ è uestro aliquā inimico usurpaueritis. In memoriā & id uobis reuocate, q̃ inter prædones, & illos qui præda nomine bella sectantur, nō aliud sit discriminē, extra q̃ quòd illi clam quid suffurentur ac rapiant, ij uerò ciuitates, adeòq; integras sæpè prouincias, publicè & palàm de



populētur ac uastent. Illud porro etiā scitote, si iam pridem id non intellexistis, quod id ipsum, quod olim gētes plurimū laudi tribuebāt, puta, nouas acquirere terras, necnon pulchris ac splendidis Augusti nominis titulis sese uenditare, eò q̄ sua imperia dilatare & amplificare, studerent: idem hodierno die non alio apud Christianos nomine censerī, quā alterum depradari, suoque uicino iniuriā inferre, item Deum ipsum, qui omnes huiusmodi incursiones & latrocinia seuerè prohibet, offendere. Hinc cuilibet facilè planū sit, quanto perē Christianis principibus difficile, atque adeò lege ipsorū impossibile, futurum sit, belli negotia eo modo peragere, ut non plus inde damni, quā commodi, percipiant. Ad hæc equidē precari ipsos inter alia uellem, modò ipsorū Maiestatibus ab historiis exempla sumere non indignū uideretur, meminisse non grauarentur, Christianos post aliquod à Christi passione tempus, toti propemodū mūdo dominatos fuisse, præcipuè autem Asiæ, & illi tractui Aphricæ, qui Aegypto proximè accedit. Ceterū durantibus bellis illorum intestinis, & dissensionibus, opportunā nactus est occasionem seductor ille Mahomet, latè suam falsam doctrinam per Orientem spargendi. Quo deinde factum est, ut infideles, ob tristes Christianorum contentiones, paulatim progressi sint, eoque pacto rationes exactè didicerint, insulas in mari mediterraneo, uidelicet Rhodum, Cretam, Cyclades, Moream, Siciliam, Corsicam, Sardiniam depradandi. Deinde quoad Aphricam, fraude occupatis freti Herculei angu

stiis, uastare & populari ceperunt regna Granata, Ar  
 ragonia, Castillia, ac totam denique Hispaniam. Post-  
 eà Pyrenæos montes supergressi, nō absimilem exercue-  
 runt tyrannidem in prouinciis regni Gallia, ut in Tholo-  
 satium finibus, in Vasconia, in Pictauiesi ditione, atque  
 adeò in tota Aquitania ad Ligeris usque fluuios. Nō ra-  
 rò etiam ex aliis partibus in diuersis portubus erumpen-  
 tes, peruagati sunt totam prouincià ad Auinionem vs-  
 que: item Apuliam, Calabriam, & maritimas Italiae  
 prouincias, ad Romæ usque suburbia. In Asia omnes tã-  
 dem prouincias sub iugum miserunt, quæ à Perside Bi-  
 thyniam vsque sese extēdunt: indeque vltèrius progres-  
 si, Hellespōtum seu sancti Georgij brachium superantes,  
 quamplurimas in Gracia strages ediderūt, qua ad Dal-  
 matiam usque euerfa, in mare Adriaticum nauigarūt,  
 ibique terram in continentibus Anconæ occuparūt, sua  
 adeò benè fortuna utentes, & occasionē quæ Christia-  
 norum bellis ipsis oblata erat, dextrè accommodantes,  
 ut Christianos temporis progressu tota Asia & Aphri-  
 ca, & potiore parte Europæ depulerint. Verū si hæc ob-  
 uetustatē parū uos exempla, Christianissimi Reges, mo-  
 ueāt, ad minimū in mentē uobis ueniat, quomodo Tur-  
 cæ præteritis hisce annis, intereà dum uestri parentes toti  
 in hoc incumberent, quo alter bello alterum conficeret;  
 in illorum propè cōspectu occuparint insulam Rhodū,  
 Belgradum, Budam, necnon complures alias in Vnga-  
 ria ciuitates & munitiones Christianis ademerint, suā-  
 que ante Viennam castra metati sint. In mari item me-  
 diterra-

*diterraneo quomodo nostra memoria deprædati sint insulas Gozam, & Tripolim, nõ sine magna trepidatione insula Malta, & ordinis Equitum diui Ioannis. En fructus ille, quem è suis bellis hæctenus perceperunt, & in posterum percepturi sunt Christiani Principes: nimirum, postquam mutuò se belli tempestatibus diu afflixerint, suàsque vires tandiu probarint, donec intestinis illis conflictibus prorsus fracta, atque in nihilum quasi redacta sint, aderit Turca pro ueteri more, impetum nõ solum in miseras uictorum reliquias, sed in ipsos etiã uictores iam lassos, & antea acti belli labore defatigatos, factururus. Nam sæpè compertum est, uictorias sine magna sanguinis effusione, etiam à parte uictoris, admodum raro contingere. Quæ res proculdubio occasionem metuendi Regi Pirrho præbuit, cum secundò aduersus Romanos sælici fuisset uictoria usus, in qua plurimos è suis desiderabat, ne si tertio superior euaderet, fieret ut ipse met tandem succumberet. At obiicient fortassis hinc aliqui, quòd etiamsi bellum nec regnandi cupiditate, nec ob illata iniuriæ uindictam, nec etiam ulla spe sua amplificandi, nedum propter leue aliquod emolumentum consequendum, suscipi debeat: attamen non eo minus dignum esse Principis maiestate, semper eò spectare, ut ex præclaris in bello rebus gestis honorem & gloriã consequatur, magnitudinisque & fortitudinis memoriam post se relinquat immortalem. Sed diligenter hinc apud uosmetipsos cogitetis quæso, Illustrissimi Principes, quòd bellum uictis sæpius ignominie plus & infamiae, quàm*

uictoribus gloria & celebritatis, apportare soleat. Si-  
 quidem multos in historiis reperimus, qui propter bellū  
 aduersum facti sunt infames, paucos uerò ob uictoriam  
 celebres & claros effectos legimus. Nam eā uix dum  
 acquisita, mox singuli aliquam eius ad se partem trahe-  
 re incipiunt, undique honorem ea sibi uendicātes. Quip-  
 pe veterani duces suo factum consilio contendunt, quòd  
 tam fœlix belli exitus contigerit: Equites se primos ia-  
 ctabūt, qui hostiū turmas & acies perruperint, frege-  
 rint: Pedites lancearum cuspides sanguinolentos osten-  
 tantes, crudelem illam lanienam se peregisse affirma-  
 bunt: Tormentarij absque machinarum fulgure dubiū  
 & nutantem futurum fuisse concursum gloriabuntur.  
 Itaque uix ullus adusque annonæ structores, & infi-  
 mū ipsum vulgus, reperietur, qui aliquā uictoriæ par-  
 tem sibi non adscribat: hīc quidem quòd commeatum  
 in castra apportarit, alius quòd pecuniam & sumptus  
 exercitui sustentando necessarios subministrauerit: ita  
 ut vix pars millesima huius uani honoris Principi adscri-  
 benda ueniat, qui non sit nisi unus in tanto militū nu-  
 mero ad bellum excipiendum, uel alteri inferendum, ne-  
 cessario. At ponamus q̄ omnia solus effecerit, quòdque  
 omnis ad eum uictoriæ laus iure referatur. Nunquid ta-  
 men non plus inde gloria fuisset consecutus, q̄ hōminis  
 uitam potius seruasset, quàm morti crudelissimæ tot tra-  
 didisset, qui equè Christiani sunt, ac ille: qui Iesum Chri-  
 stum, suum, ut ille, caput agnoscunt: qui eiusdem Chri-  
 sti sanguine redempti, quo ille: qui post hāc denique ui-

tam in regno calorum heredes se futuros, quemadmodum ille, sperant? Considerate, Reges Christianissimi, quod quod benefacta malefactis sunt laudabiliora, eò uobis laudabilius & honestius erit, principem aliquem in sua restituere, quàm inde eum pellere: in suo eum statu tueri, quàm eo ipsum spoliare: dignitatem illi suam sartam tectam relinquere & conseruare, quàm ad inferiore vulgi conditionem eum detrudere: quæ res, si accadat, ad communem omnium principum pudorem redundat. Ceterum cogitatis, fortè, principi uiro decorum esse, ciuitatem aliquam ui expugnare, diripere, euertere. Sed quemadmodum longè magnificentius & praeclarius est aedificium aliquod splendidum extruere, quàm destruere: ita plus laudis uobis comparabitis, ciuitatis alicuius fundamenta ponendo, quàm duodecim solo æquando. Abiicite igitur ruinosas eiusmodi laudes, quæ in tot miseros & calamitosos homines recidunt, & uobis interea temporis non tantum adferunt commodi, quantum doloris & commiserationis, cum miserabilis & tristis illius desolationis recordamini. Memoria uobis etiam non excidat, hominum gloriam ualde caducam & instabilem, nec ullam esse, præterquam solius Dei, æternam & perpetuam. Illud te prætereà nō lateat, Rex Christianissime, neque Paschalē in historia tua Latina, neque me in Gallica, quam de te, de quæ tuis maioribus cōscribere aggredior, aliud, unde plus ad uos laudis redundet, posteritati relinquere posse, quàm si dicamus, cum ad tempus istud peruenerimus, de quæ hac pace tractaturi simus,

„ Expertum te fuisse plurimas & diuersas belli fortunas,  
 „ actandem ad pacem omnibus in orbe Christiano regnis  
 „ tribuendam animum adiecisse, & maiorem deinde æ-  
 „ tatis partem ad tuos subditos in tranquillitate retinen-  
 „ dos peregrisse: operam porrò dedisse, ut tuo in regno lite-  
 „ rarum studia florent, honestâque disciplina subditorû  
 „ animi ad uirtutē, digna laboris mercede proposita, ex-  
 „ citarētur: & , è contrario , à uitis seuera delictorum cē-  
 „ sura auocarentur. Tuam denique maiestātē , Dei Opt.  
 „ Max. honorem & cultum quotidie reuerenter præ ocu-  
 „ lis habuisse, necnon iustitiæ & æquitatis iugiter memo-  
 „ rem extitisse. In summa, utilitatem & commodum obe-  
 „ diētissimi tui populi imprimis quasiuisse. En finis pul-  
 „ cherrimus, & historie conclusio honestissima, quam ul-  
 „ lus certē Christianorum Rex perpetuò apud posterita-  
 „ tem immortalī uirtutum suarum laude uicturus, expe-  
 „ tere unquam possit. Nam principes, qui rationibus parū  
 „ suæ legi congruis, necnon religioni aduersantibus, im-  
 „ mortales se reddere conati sunt, illi in ipso mortis articu-  
 „ lo prorsus sapē desperarunt, cū in mentem illis mors  
 „ reuocaret, quā uarias in uita habuissent deliberatio-  
 „ nes, consilia multum intricata, spem lōgam & euanidā,  
 „ ac rerum denique desideratarum fruitionem perquam  
 „ exiguam. At respondebitis mihi, Reges Christianissimi,  
 „ rationes à me hæctenus recitatas, nequaquam tandiu  
 „ bello occupatos uos detinuisse, uerū causam habuisse  
 „ uos, quæ ad arma sumenda uos permouerit, longē iustis-  
 „ simam: nimirum ut regiones & terras, quæ iure ad uos  
 „ spectant,



*ſpectant, & à ueſtris Coronis dependēt, recuperaretis. Eſto ſanè, quòd terras, ducatus, & regna in controuerſia habeatis. Sed nunquid non aliud nouiſtis medium finem ueſtris litibus imponendi concinnius, quàm ut omnes ueſtras vires ad mutuò uos exſcindendos atque euertendos impendatis, ueſtrique populi ſanguinem innocentem temerè effundatis? Arbitror equidem uos minimè ignorare, rei controuerſæ magnitudinem non efficere nimiam illam difficultatem. Accidit non rarò, ut de tribus partibus trium terræ iugerum, quæ ſub tribus diuerſis ſita ſunt iuriſdictionibus, atque trium ſtirpium ſucceſſione ad aliquem deuoluta, qui abſque liberis deceſſit, controuerſiæ ſiant, quæ inter iuriſconſultos multo ad decidendum ſunt difficilioreſ, nec non tres illæ trium iugerum partes ad partiendum inter defuncti cohæredes collaterales intricatæ magis, quàm ſi de ducatu, uel regno aliquo, quæſtio moueretur. Ac tui quidem maiores, Rex Chriſtianiſſime, Burgundiæ ducatum Coronæ Fræciæ per Regem Iohannem eius nominis primum, adiectum fuiſſe prætenderant, eò quòd in paternæ hereditatis diuiſione à rege Carolo eius nominis quinto, Philippo fratri, nec non maſculis eius hæredibus, ſub hac cõditione, ut linea hæredũ marium deſiciente ad Coronam reuerteretur, attributus fuerit. E contratio uerò, defunctus tuus parens, Rex Catholice, Philippi Caſtilliæ Regis filius, qui Mariam vnicam domus Burgundicæ hæredem relictam, vxorem duxerat, eundem ducatum ad fæminas recidiſſe contenderat, non obſtante clauſula illa*

cōditionali recidiua, quæ in inuestitura fuerat adiecta. Qui igitur sit, quòd lis hæc, quæ in nostra Curia nihil aliud quàm processus quidã de successione iudiciarius uocatur, aliter quàm ferro diiudicari nequeat? Idẽ de Mediolanensi ducatu dicere possum, qui tot iam bellis, tantisque cruentis stragibus, nobilitatus ac celebris effectus est. Nam de re alia quæstio non uertitur, nisi de successione Valentina Philippi Mariae Mediolani Ducis primogenita, quæ Ludouico Aureliarũ Duci, Caroli quinti regis filio, in matrimonium fuerat collocata. Quippe totius crudelis huius disputationis quæstio in eo constiterat, An Philippi spuria progenies, præferri in ducatus successione legitima deberet. Tantundem inueniet quis in controuersiis de regno Neapolitano, ubi principalis hac agitur quæstio, Ad utrũuis regnum pertineat, an ad Alphonsũ regem Arragonum, quem Iohanna ultima Neapolis regina adoptauerat, & post aliquod inde tẽpus ob suã ingratitudinẽ exheredauerat: an uerò ad Ludouicum & Renatum Andegauensem eiusque hæredes, quos trium pontificum auctoritate & consensu, illa unum post alterum instituerat. Breuiter tota in eo consistit quæstio, ut inquiratur, An adoptio iustissima de causa reuocata efficere possit, ut in successione regni Neapolitani extraneus adoptatus ac repudiatu sive emancipatus, ueris & antiquis hæredibus, necnon noua & uerè legitima institutione confirmatis, præferri debeat. Mihi porrò ad hoc respondeatis quæso, Reges Christianissimi, Quid si armorum loco, quibus hæctenus estis

usi, selectos aliquot iudices inter sanctos cardinales, pietati deditos episcopos, doctrina excellentes praesides, libellorum magistros, regnorum uestrorum, uel aliunde accersitos, consiliarios ac iurisconsultos, adhibuissetis, atque praestantium horum uirorum consilio, qui a uobis lecti, necnon iuribus uestris sufficienter instructi essent, rem controuersam transgissetis, dissidiaque, & his similia composuissetis? Hoccine dignitati uestrae conuenientius, diuinaque uoluntati conformius, necnon populo uestro damnosum minus, adeoque uobismetipsis acceptius fuisset? Adhuc si subdiis uestris sauerè adeò hereditaria sua bona ense uel ferro ne diuidant prohibeatis, cur uestra uos tanta cum sanguinis effusione diuiditis? Deinde si commodius uobis uideatur, ut certus illis iudicum numerus, qui ipsorum dirimant contentiones, constituantur, cur eodem modo uestra diiudicari recusatis, quo de subditorum bonis sententias ferri procuratis? Idèò ne ad arma multitudinem concurrere inhibeatis, omniaque iure peragi precipiatis, ne uestrarum prouinciarum status & tranquillitas inturbetur? Quare uestris interim contentionibus pub. totius Christianitatis quietè frangi & turbari permittitis? Si imperium uobis Deus in suum populum dederat, ut quod iustum est sectari eum efficiatis, cur idem inter uos mutuò non obseruatis? Commodius ne uobis uidetur cruento & funesto bello uestra dissidia, quàm principum, & aliorum praestantium uirorum, quorum fidem & integritatem longo estis usu experti, iudicio terminari? Commodius item ne uobis ui-

detur inconstantis fortuna uos arbitrio, quàm doctrina  
 & uirtute præstantium uirorum sapienti censura, sub-  
 mittere? Vsq; adeò ne fortunam mauultis sequi, quàm  
 rectum rationis iudicium? Considerat' ne, an uerò de-  
 sperati homines, quæso, æstimandi sunt, qui pro re solùm  
 dubia, & prorsus incerta, ea periculo fortunæ exponūt,  
 quæ semper illis fuerant certa, nec in ullam unquam ue-  
 nerant controuersiam? Equidem uobis confirmo, Reges  
 Christianissimi, quòd si arbitros, qui uestras dirimant  
 controuersias, elegeritis, sententia adeò iniqua ferri non  
 possit, quin, si illi standum arbitremini, plus uobis com-  
 modi adferat, quàm bellum uel maxime secundū. Nam  
 ad minimum hoc inde habituri estis bonum, ut cū ue-  
 stras amplificare terras cogitatis, subditorum numerū  
 non diminuatis. Deinde pro eo quòd agros & colles, qui  
 profectò ad uestrarum Maiestatum comparationem  
 exigui sunt valoris, satagitis acquirere, uestri po-  
 puli, atque adeò proximioris interdum uestri cogna-  
 ti vitam non amittatis: quas, me hercule, res, boni Prin-  
 cipes pluris æstimare, quàm omnes ducatus, præci-  
 puàque huius mūdi regna, & solēt & debent. Sed ani-  
 mum aduertite, quæso: postquam bellum diu peregistis  
 ad hoc tādē recurrere uobis necessum fuit, ut aliquot  
 ex illis, qui primas apud uos partes obtinent, utrinque  
 ordinarentur, qui placidè, quod à multis nunc annis uos  
 uestrique parentes, armorum ui, diiudicare conati estis,  
 transigerent. Atqui cur ab initio hanc iustitiæ uiam non  
 estis ingressi? Verū accidit fortassis, q̄ quies nō nisi post

longum & diuturnum laborem, corporisque defatigationem grata habeatur: quemadmodū quæ dulcia sunt palato non sapiunt, nisi prægustatis amaris. At utinam Deus Opt. Max. eam Principibus gratiam aliquando clemēter largiatur, ut quò in perpetuū fugari hæc perniciosissima inter eos belli pestis queat, duas hæc solūm leges inuiolabiles inter se mutuò seruarent:

Quoties duo Principes Christiani aliquam habebūt controuersiam, mox talem principum, procerum, & aliorum doctrina præstantium virorum numerum eligent, quos ipsimet consulere, ac quorum deinde iudicio sua terminari dissidia uolent.

Ceterū si alteruter illorum ad arma recurrere, quàm rationi & æquitati obtemperare maluerit, aut posteaquam in iudices consensum est, pertinaciter illorum sententia fuerit aduersatus, is Christianæ Reip. inimicus capitalis reputabitur, omnesque suas per hoc ueteres confæderationes amittet, necnon reliqui Christiani Principes ad eius usque fratres, omnes suas in eum uires conferent, ut ad debita eum officia præstanda compellant. Deinde si in sua rebellionē & contumacia perseuerauerit, regno uelut indignus fugabitur, inque certo aliquo loco ita circumscribetur, nullam ut nocendi malēuefaciendi habiturus sit occasiōē. Eius denique sceptrā & diademata in illum reliqui transferent, qui ex ita proscripti familia gradu proximior erit, quemque æquitati minus inimicum, publicæ uerò tranquillitatis custodiendæ studiosum magis, animaduertent.

Enimuero si duæ hæc leges semper inter Christianos Principes viguissent, ita ut nulla inter ipsos bella excitata fuissent, sed perpetuò coniuncti confederatique mansissent, nunquam illos Turcæ spoliassent Africa & Asia, nec Trapezuntij & Constantinopolis diademata illis ademissent, complurisque alias in Europa magnas & amplissimas prouincias suam in potestatem rede-gissent. At hîc rursus cogitabitis fortassis, Reges Christianissimi, quod tam profundo uos pacis somno sopitos esse uelim, ut nullo unquam tempore de bello aliquo gerendo cogitetis. Verum, è diuerso, humiliter rogatos uos cupio, ut nouum hîc belligerandi modum uobis proponatis, qui in perpetua uos pace non difficulter postea retinebit, nimirum ut per totam uitam fortiter bellum exerceatis aduersus Ambitionem, aduersus insatiabilem dominandi cupiditatem, aduersus iniustitiam, iracundiã, aduersus denique uanam & inutilem huius mundi gloriam. Et quò facilius, minori que cum dispendio, crudeles eiusmodi nominis Christiani hostes, necnon ueteres nostræ quietis, nostræ que religionis, perturbatores, trucidare possitis, imprimis comitatos uos esse oportebit modestia, temperantia, æquitate, frugalitate, & super omnia ita uos componere, ut semper Dei honorem, timorẽ, reuerentiam, uestros ante oculos, tanquam certissimos negotiorum uestrorum duces, & antesignanos, habeatis. Quippe talibus ducibus munitum esse Christiani Principis exercitum prorsus est necessarium, si hostes suos, uicia, ferocissimos superare, uincere, domare cupiat. Ete-



nim si uictoria illos gloriosa non subiugauerit, & uelut in triumpho palàm non ostentauerit, tātum abest ut pacem post longum & diuturnum bellum cum uicinis suis colat, ut ne quidem apud semetipsum retinere eandem sciat. Qui uerò firmo, & constanti, uirtutis amore, nec non uero Dei eiusque legis zelo, opponere se, fortiterque resistere, uitiosis suis affectibus nouit, is ad rationis normam, Deique uoluntatem, se accommodans, solus unà cum suo populo, bonis à Deo sibi concessis, necnon pacis felicitàte, frui poterit, omniàque à se incommoda, detrimenta, & alia belli mala, facile fugabit. Ecce igitur, Reges Christianissimi, præcipuū & principale mediū, quo diu sælix hæc pax, quam nuper Christianitati conciliastis, commodissimè retineri poterit. Huc accedit & illud, quòd consilio & prudentia consultissimorum uestrorum hominum, eandem hanc pacem nouis duorum connubiorum sacris ratificari uolueritis: quæ sanè uincula tantæ sunt apud Deum authoritatis, necnon apud homines commendationis, ut difficile in posterum alterutri uestrum sit futurum, bellum aliquod inter uos excitare, quod benignitas, suauitas, liberalitas, magnificentia inter uos mutua, non facile sedabit. Itaque duobus hisce mediis pax perpetua durabit, si tertium uobis in obliuionem non ueniat, quod etià hucusque non ignorastis, ut in consilio nimirum, & maioris momēti negotiorum deliberationibus, illorum utamini opera, quos ingenij excellentia, multàque rerum experientia, splendidum inter amplissimos in uestris aulis principes ac do-

minos dignitatis gradum adipisci fecerat. Illi nanque  
 pro ea, qua præditi sunt sapientia, rectissimè uobis cõ-  
 siliū dabunt, quo pacto uestra in pace regna diu con-  
 seruari queāt. Hi uerò fortuna uarias uicissitudines ex-  
 perti, à bello uos suscipiendo commodè dehortabuntur:  
 Nisi excellens aliquis fortè, & heroica præditus uirtute,  
 præteritorum bellorum labore nondum prorsus defatiga-  
 tus, ad secretum aliquod fœdus faciendum, & militem  
 conscriptum ac paratum ut habeatis, hortari uos uolue-  
 rit, ut prima deinde occasione, hoc est, primis dissensionibus,  
 quæ propediem inter Turcas exorientur, totius illos  
 Christianitatis uiribus aggrediamur. Verum ad me  
 quod attinet, nolo in præsentiarū nisi de pace inter Chri-  
 stianos colenda quicquam suadere, vósque è somno ni-  
 miū profundo, quo hætenus certè indormiistis, paulu-  
 lum excitare. Itaque nulla nunc mentio à me fiet misè-  
 rabiliū lamentationum regij sanguinis Constantino-  
 politanorū Imperatorū, qui frustra tot iam annis uin-  
 dictam à uobis implorarunt. Neque etiā cōmouere mea  
 uos oratione nunc statui, ad commiserationem tristissi-  
 mæ illius seruitutis Græciæ, & maioris Vngariæ partis,  
 necnō tot calamitosorū Christianorum, quos infideles illi  
 canes, uinculis & catenis cōstrictos tenent, boum & e-  
 quorum loco illis in terra colenda utētes. Denique nec ul-  
 la me uerba facturum proposui de proscriptis ac perditis  
 in mari latronibus, sed omnia hæc in aliud tēpus aptius  
 reseruabo. Spero enim in lucem editurum me breui,  
 præclara & memorabilia maiorum nostrorum gesta,  
 qui

qui duce Godofredo Billioneo omnes illas Afie p̄uincias, quę ab Helleſpōto ad magnū usque fluuiū Euphratem se extēdunt, necnō sepulchrū Domini, & totam terrā sanctā, ē Mahometistica tyrānide in libertatē gloriose vindicarunt. Etenim habebūt, uti coniectura auguror, plus authoritatis & uiriū maiorū uestrorum exēpla, quā nuda hac cōmemoratio: idque cū alias ob causas, tum uel ob hāc, quòd planum me uobis facturum sperē, nihil ab illis tunc temporis præclarè gestum, quod uobis hoc tēpore ualde difficile, nedū impossibile, uideri queat: cū præsertim tot præclari duces uobis præsto sint, tot animosi bellatores, tam equites, quā pedites, tot denique ingenio uiri præstātissimi, qui uariis stratagematum generibus instructi, dextrē atque ingeniose uiriū uestrarū furorem & impetū exequi norunt. Reuertor igitur unde paululum sum digressus ad propositam de pace orationem. Et quidē postquā uestras precatus fuero Maiestates, ut imprimis meminisse dignētur, bellū Christianis, nec à Deo, nec à Natura, permissum esse: siue id maiestatis ostētanda gratia, siue regnandi cupiditate, siue ambitionis, utilitatis, honoris, gloriæ respectu, siue etiam ob terras amissas recuperandas, tentetur. Deinde quòd pax illo solū bello, quod cum uitiis assidue gerere nos oportebit, necnon splendore illo sacrosanctorum fœderum uestrarum familiarum, prudentiūque consilio illorum, quos ingenio & longa rerum experientia præstātes circa uos habetis, retineri debeat, nihil amplius superest, quā ut obedientissimorum uestrorum subdito-

rum nomine immortales uobis gratias agā, pro eo quòd hanc illis quietem & securitatem in locum laboris & desperationis rerum suarum, in quibus, furore belli durante, languidi iacebant, effeceritis. Postremò ad uos quod attinet, amplissimi viri, qui tantoperè desiderata, nobisque propemodum insperata, huius pacis authores quasi extitistis, cùm beneficiorum uestrorum in eo magnitudo tanta sit, nobis ut gratitudinis exhibendæ facultatem adimat, amplius polliceri nihil possumus, quàm debita nos reuerentia & honore perpetuò uos prosecuturos, necnon pub. tranquillitatis authores, Christianitatis patres, adeoque humani generis conseruatores, uos agnituros. Accipite igitur, unà cum beneficiis illis, quæ in uestro uobis legationis munere Deus ipse tribuit, gratiarum hæc actiones, quas uniuersi homines uobis nūc offerūt, pro eo quòd ab incendio illorum domos, à sacrilegis templa, à rapinis ciuitates, à sterilitate agros, prouincias denique illorum à solitudine & uastitate, conseruaueritis. Operā quæso prætereà date, ut tanto in posterum nobis bono diu perfrui liceat: & ne breuior eius felicitatis fruitio, tanto maiores nobis adferat dolores, ad quos iam pridem, proh dolor, satis multum adsueuimus.

DIXI.